

constitutum, ut quicumque bona faciunt, habeant misericordem in vobis adiutorem, vindicem fortem, qui mala faciunt. Ante omnia pravorum consilia caveto, et personarum acceptiones. Sine bonorum consilio nihil facito, sed et unicuique proprius servetur honor. Unumquemque sua fides commendet. Nolite diligere eum, quem Deus odit, id est qui sua contempnit precepta. Neque odiais eum, qui Deum diligit, id est qui sua mandata custodit¹. Nolite diligere adulatorem, sed sincero ametur corde, qui veritatem vobis profert. Honorate sacerdotes, Deum timentes magnificate. Veritatem amate et sequimini. Clamores populi moderate conpescite. Iudices pravorum viriliter atque severe corripite, ut qui mali sunt regalem timeant auctoritatem, teneant legem et rationem, boni vero a vobis instructi, ament fidem et misericordiam. Singuli iustum iudicent iudicium. Sapientium dicta prudenter interrogate. Nec vos pudeat interrogare quod ignoratis. Purum sensum habeto. Per singula stabilis sit sermo. Considerate antequam definiatis, et postquam definieritis non inmutetis, si tamen non sit malus aut noxius. Non enim decet regem mutabilem esse. Ova aspidum nuda planta calcare caveto. Recordamini preterita et cognoscite futura; intellegite quod scriptum est: 'Divitiae si affluent, nolite cor adponere'². Cogitate diem novissimum, ne per securitatem offensam Dei incurratis, et cognoscite vos mortalem esse. Licet enim regia sublimatus dignitate, nequaquam mors pretereundum putabit cum venerit, sed omnium ut pauperum ita etiam divitum et regum oculos amara claudet.

His paucissimis verbis vestram presumpsi admonere sublimitatem, piissimi genitoris vestri vestroque instigatus amore, cupiens et optans vestram excellentiam ita in presenti seculo prosperari, ut de caducis et de terrenis pervenire mereamini ad stabilia et firma in celis palatia, quæ nec³ oculus vidit nec auris audivit nec in cor hominis ascendit, quæ preparavit Deus diligentibus se.

1) 'custudit' Hs. 2) Psal. 61, 11. 3) Vgl. 1 Cor. 2, 9.